

INUIT ATAQTIGIIT

Inatsisartuni



9. august 2017

UKA2017/132

Inatsisartut Suleriaasianni § 33, imm. 1 naapertorlugu Inatsisartut aalajangiiffigisassaannik siunnersuut imaattoq matumuuna nassiuppara.

Avatangiisit innarlitsaaliorneqarnissaannik Inatsisartut Inatsisaat nr. 9, 22. november 2011-meersumi kapitali 6-imi, imeqarfiit killeqarfiini suliassaartoqartillugu immikkut akuersissuteqartarnermut tunngatillugu, aalajangersimasumik erseqqinnerusumillu maleruagassiuunneqarnissaanut Naalakkersuisut kingusinnerpaamik UKA18-imut siunnersuummik suliaraqquullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Villy Olsvig, Inuit Ataqatigiit)

Tunngavilersuut:

Eqqissimatitsinermut Avatangiisinillu Ataatsimiititaliami ilaasortaasugut piffissami sivisungaatsiartumi Inatsisartut Inatsisaat nr. 9, 22. november 2011-meersoq sammisarismavarput. Inatsisartut inatsisaat misissorlugu kommunini arlaqartuni inuussutissarsiutinik ingerlatsiniarnernik siuarsaanissanut iluaqutaasussanullu arlalitsigut unammisassaartoq ersarissisimavoq. Inatsit naapertorlugu tunngaviatigut imeqarfiit killeqarfiisa iluini suliniuteqartoqarsinnaangilaq.

Tamannalu tunuliaqutaralugu suliassaq ingerlateqqikkusussimavara, taamatullu qulaani ajornartorsiummut taaneqartumut – aalajangersimasumik naleqqussaansaq siunertaralugu anguniarlugulu Naalakkersuisut peqquneqarnissaannik matumuuna siunnersuuteqarlunga. Inatsimmi § 28, imm. 3-mi avatangiisit innarlerneqarnaveersaarnissaanut tunngasumi Imermik pilersuiveqarfik § 31 malillugu imissap pitsaassusissaanut *Naalakkersuisut piumasaqaatigisaannut eqqortitsinermik qulakkeerinnissinnaasumik imermik suliarinniffeqarpat imm. 2-mi sulianik taaneqartunik arlaannik ataatsimik arlalinnilluunniit akuersisunik Naalakkersuisut maleruagassaliorsinnaapput.* Takusinnaasat naapertorlugit Naalakkersuisuni sukumiinerusunik maleruagassioortoqarsimangilaq, taamaammallu – pineqartumi inatsisitigut isumannaatsuuneq naleqqussaarinissarluk pisariaqartinneqartutut isigisariaqarlutik.

Imaappormi illoqarfiit nunaqarfiillu pisariunngitsumik imermik pilersorsinnaansaq malillugu inissitsiterneqarsimasut. Imeqarfiit killeqarfiinik inissitsinernili ajorluartumik takuneqarsinnaalersimavoq illoqarfiit nunaqarfiillu – imeqarfiit killeqarfiisa iluini inissimalersimasut (tamatumani Sisimiut aamma Qaqortoq assersuutissaqqilluarput), tamannalu ineriartortitsinermut ajornartorsiutaasumik killilersuisinnaallunilu. Tassani ilaavortaaq illoqarfinni nunaqarfinilu inuussutissarsiornikkut ineriartortitsinermut sunniuteqarnera. Inatsimmi imeqarfiup killeqarfiisa iluini suut pilersinneqarsinnaaneri ineriartortinneqarsinnaanerilu annertuumik killilerneqarput.

Assersuutigalugu Norge-mi erngup imerneqarsinnaasup 85%-ia tikillugu tatsinit pissarsiarineqartarpoq. Imeqarfiup killeqarfiisa iluini ingerlatsiniarnerni navianartorsiorfigineqarsinnaasunik aaqqissorluakkamik paatsoorneqarsinnaangitsumillu

naliliisinnaanerit siunertalugit sakkussaminnik nassaarsimapput, taannalu ROS-analyse-mik taallugu (Navianartoq Ajortiasorlu pillugit nalilersueqqissaarnerit).

Tamassuma saniatigut ROS-analyse-mik taaguuteqartinneqartoq upalungaarsimanissamut pilersaarusiortoqarsimavoq. ROS-analyse-mut atatillugu upalungaarsimanermut pilersaarut assigiinngitsorpasuarunik imaqtussaavoq, ilaatigut tassaallutik ullormiit ullormut isumagineqartartussanut siunnersuutit, ilaatigut tassaallutik ingerlatsinermik nakkutilliineq, taammatullu ajutooriataartoqarsinnaanernik navianartorsiornerup annikinnerpaanissaa siunertaralugu pisartussaalluni.

Maani nammineq inatsiseqarnitsinnut ilaatillugu nalunaarusiornissaq ilitsersuusiornissarlu, assersuutigalugu norskit ROS-imut atatillugu ilitsersuusiaat toqqammavigalugu makkunatigut iluaqutaasinnaassaaq:

- Qinnuteqarnissami suliasartanik oqilisaasussaassaaq, taamatut qinnuteqarnermi piunasaqaatit annertussusaallu ersarissumik nassuiarneqassammata.
 - Qinnuteqaatit assigiiaartumik suliarineqarnissaat qinnuteqaatillu pitsaalluarnissaannik kinguneqartussaassaaq.
 - Suliniutiginiakkap akuerineqarsinnaaneranik akuersinissap Namminersorlutik Oqartussanut oqilisarneqassaaq. Qinnuteqaammut ingerlanniakkamut paasissutissat tunngasut tamarmik ilaatinneqariissapput. Taamaammallu annertunerusumik paasissutissanik pissarsiniarnissaq pisariaqartariaqassanngilaq.
 - Immikkut iliorfigineqarumalluni qinnuteqarnermi suliarineqartussat Namminersorlutik Oqartussanut annikillisarneqassapput, taamatuttaarlu piffissamik atuineq sivikillineqarsinnaalluni.
 - Suliniutiginiakkap aallartisannginnerani akuersisoqarsinnaaneranik periarfissanik sanaartortussap naliliiniarnera oqilisarneqassaaq.
- Naggasiullugu tikkuarusutara tassaavoq erngup imigassatut naatsorsuussap ajortinneqarnissaa siunertarinnginnakku, taamatullu erngup pissarsiareqqarfia mingutsinniarneqanngimmat. Siunnersuut saqqummiunneqartoq ima tunngaveqarpoq assigiisumik ilitsersuutitalimmik sakkussaliornikkut suliniutiginiakkat aalajangersimasut navianartoqarsinnaanerini nalilersuinikkut suliasartaanik pimoorussilluni sukkasuumik ingerlatsisoqarsinnaammat, taamaaliornikkullu imeq innuttaasuni imigassatut atugassaq navianartorsiortinnagu illoqarfinni nunaqarfinnilu ineriartorneq siuarsarneqarsinnaalersillugu.

Aningaasaqarnikkut allaffissornikkullu pisortanut kingunerisassat

Atorfilik AC-fuldmægtig – inatsimmi piareersagassanut ukiup affaata missaa atortariaqassagaa, taamatullu kr. 250.000 miss. atorneqarnissaat naatsorsuutigineqarpoq.

Aningaasaqarnikkut allaffissornikkullu namminersortunut kingunerisassat

Soqanngilaq

Aningaasaqarnikkut allaffissornikkullu innuttaasunut kingunerisassat

Soqanngilaq